

# En Svizra èn ils pretschs ils pli auts

## Cumparaziun dals pretschs per medicaments cun l'exteriur

DA LUCAS DEPLAZES / ANR

**■ Interpharma e Santésuisse han preschentà ier a Berna ils resultats ressortids or da las cumparaziuns cun noss pajais vischins. Ils medicaments custan en Svizra 9% dapli. Generica il dubel. Il nivel dals pretschs per medicaments protegì d'ina patenta èn en Svizra per nov pertschient pli chars ch'en l'exteriur. L'onn 2016 era la differenza schizunt 14%. Medicaments senza protecciun d'ina patenta «Generica» custan en Svizra 52% dapli. Quest resultat è resor-tì d'ina cumparaziun cun ils suandants pajais: Germania, Austria, Frantscha, Belgia, Danemarc, Ollanda, Svezia, Finlanda e Gronda Britannia. Mintga trais onns cumparegian Interpharma e Santésuisse ils pretschs dals 250 medicaments originals ils pli dumandads. Exponentes da l'industria farmaceutica han fatg attent ch'il curs da stgomi dal daner haja er ina influenza sin la calculaziun. Tenor ils experts èn 50 pertschient dals medicaments sut protecciun d'ina patenta. Tut en tut han ins da or l'onn passà 6,8 milliardas francs per ils medicaments u 5,7% dapli che l'onn avant. Ils experts han erui ch'ils Svizzers pajan 800 francs l'onn per medicaments. Questas**

constataziuns cumpeglian il sector medical ambulat. Ils medicaments per ils cas staziunars (cun domicil en l'ospital) èn cuntegnids en las pauschalas per cas. 53% dals medicaments èn actualmain patentads, 39% èn senza protecciun d'ina patenta e 14% è la cumpart da Generica.

### Generica

La cumparaziun sin il sector da Generica cumpeglia 250 medicaments senza protecciun d'ina patenta. Ils pretschs da Generica èn en Svizra per 52% pli chars

ch'en l'exteriur. *Verena Nold*, la directura da Santésuisse, ha constatà latiers: «Tgi che passenta sias vacanzas en l'ester paja là bler pli pauc che tar nus.» Santésuisse pretenda perquai ina adattaziun a l'exteriur dals pretschs per medicaments senza protecciun d'ina patenta, e quai senza retard. Ina tala correctura dals pretschs tar Generica lubess da spargnar tschients milliuns francs. Necessary fiss plinavant

da motivar medis e pazients da far dapli diever da Generica. Actualmain è il diever da Generica en Svizra cun 14% pli che modest. Generica ha la medema qualidad ed il medem effect sco ils medicaments originals, han accentuà ils experts.

### Grond effect positiv

*René Bucholzer*, mainagestiun dad Interpharma, ha punctuà il grond effect posi-

tiv dals medicament en favur da mantegnair la sanadad da noss pievel. Il progress sin il sector farmaceutic ha lubì da reducir ils cas da motoris massivamein, sco per exempel tar Aids/Sida.

Oz pon ins per exempel curar la sanadad dals cas da cancer, ha constatà Bucholzer e fatg attent che l'industria farmaceutica saja obligada da pudair por-scher ils medicaments sin la glista da tut temp.

### Ils pazients svizzers pajan memia bler

*Alain Berset*, il minister da la sanadad publica, ha decretà diversas reduziuns dals pretschs per tschients medicaments che lubessan da spargnar passa ina milliarda francs. A l'industria farmaceutica èsi dentant adina reussì d'offrir novs medicaments cun pretschs bler pli auts. Quest agir ha impedì mesiras da franar l'augment dals pretschs per ils medicaments.



En Svizra èn ils medicaments bler pli chars ch'en l'exteriur.

MAD

### In scandal

En pliras comunicaziuns ha *Stefan Meierhans*, il survegliader dals pretschs, critigà ils custs bler memia auts per ils medicaments ch'ils pazients en Svizra ston pagar. Meierhans vul regularmain cumparaziuns dals pretschs cun l'exteriur e pretenda che las cassas da malsauns surpiglian mo ils pretschs ils pli favuraivels. Quai lubess da spargnar var 388 milliuns francs l'onn. Tenor Meierhans muntan ils pretschs per ils medicaments en Svizra in scandal (20min.ch30.05.18). En vista a questa situaziun saja ina midada da la lescha indispensabla.